

書名 空同先生集六十三卷 嘉靖九年序刊本  
撰者 明 李夢陽 撰  
卷 卷四十三  
內容分類 集 別集-明中葉  
索書號 倉石:40084  
編號 4008000

# 卷四十三



空同先生集卷第一

賦一十首

疑賦

思賦

省愆賦

緒寓賦

侯軒子賦

十首

賦

乾  
坤  
高卑易矣  
星辰在  
下  
江河逆矣  
天喬喬天

北郡李夢陽撰

鈍賦

述征賦

宣歸賦

寄兒賦

竹石賦



空同先生集卷第四十二

空同先生集卷第四十三

北郡李夢陽撰

文 墓志九首

明故朝列大夫宗人府儀賓左公遷葬志銘

左舜欽墓志銘 儀賓左公合葬志銘

封宜人亡妻左氏墓志銘

處士松山先生墓志銘

隱亭先生墓志銘 高處士合葬志銘

劉處士墓志銘 梅山先生墓志銘

墓志九首

明故朝列大夫宗人府儀賓左公遷葬志銘



左公諱夢麟字應瑞年四十弘治三年六月三日病卒葬白塔兒原梨園中葬二十二年而為正德五年於是始徙于今墓云今墓去舊墓東北四百步而近李夢陽曰嗚呼古不修墓乃余今忍銘我外舅焉按左氏永新逢橋人也語曰逢橋八百左而公曾祖曰左東吳稱堂下派東吳生仁宏仁宏生左輔是為知州公知州公為南道御史正統間嘗有激劾之意謫炎方驛丞會喪其胡夫人乃更娶崔夫人崔夫人以景泰二年五月七日生公炎方驛年數歲知州公起尉氏知縣從舟行墮水流里所出不死天順五年河決大梁鎮平恭靖王如尉氏見公以之歸為其孫贊

武郡君後六年誥授公朝列大夫為儀賓云恭靖王周定王第八子於高皇帝為庶孫而周定憲時儀賓最貴重與封疆官分席而抗禮道逢則以鞭相揖及公為儀賓乃諸儀賓者業稍稍降矣公出獨張蓋駿馬見諸所官悉如前定憲時諸所官不平也久之乃顧獨敬重公以公才行故然公固美貌奇偉作詩善畫今祿給不以時王孫貧者出或不能具驢車矧如儀賓矧如我外舅行嗟嗟悲乎悲乎郡君父曰四鎮國將軍溺佛燒丹四方諸以佛燒丹來率輒騙其金資居無何將軍貧積負以萬數無能償而眾債家輒又日謹其門將軍泣欲尋死會公謁將軍出因佯

呼曰將軍死矣衆愕然欲散走公乃止之謂曰若等自度將軍力能盡償汝乎且汝等必迫之使死乃已邪衆業懼無敢言者公曰假如人償其半能以全券見還乎衆皆喜諾謝曰願矣於是公乃自往貸諸豪富家緡諸豪富故雅重公乃無不願與緡如其半數公又輒陰易絲絮布帛銅錫等昂其直與債家因又勒其半三之一而即以其一轉生息償前諸豪富家歲餘諸所負者皆平矣公病革強起坐會氣絕將軍曰嗟我固謂吾兒爲佛也力主坐葬於是公有四子長曰國璿年十三歲次曰國璣年十一歲次曰國玉次曰國衡年各四歲以卑釋蓋咸莫克成我公葬事

公卒十四年而國璿卒葬之又八年國玉卒將葬國璣號哭向母郡君叩頭請曰夫葬者所以妥體魄而棲靈神也乃我父忍營營逮茲郡君哭曰嗟女夫謂何於是李夢陽趨而進相向哭對曰禮也乃於是謀徙于今墓葬用北首焉然公肌體完也髮鬚不脫落故衣衾弗朽也是時郡君髮毵毵皤矣率其二子四婦孫四男二女暨厥婿厥女暨外孫環之哭嗚呼公詎知二十年後如此哉父老曰往水退有人爭田邊我田公乃置酒召爭者謂曰第捐其餘與我乃其人慙罷爭亦不侵於我田即今葬地云蓋在氏三世異墓曰仁宏者永新神公壇墓其彭夫人襄陽墓知州

公永新左方墓胡夫人炎方驛墓崔夫人尉氏墓惟公墓今并葬其二子銘曰下不墊黃泉上不見白日改而妥之公以室

左舜欽墓志銘

左舜欽者我外舅第三子也名國玉字舜欽母曰廣武郡君以咸化二十三年九月七日生舜欽會 孝宗皇帝改元詔下故其小名曰弘保兒云生四歲喪我外舅十八娶鄭氏女鄭氏女母曰遂寧郡君廣武郡君同母弟也舜欽遂連生二子年二十四以病卒李子曰嗟哉天子舜欽竟以此死邪仁者不壽乃余則何言矣前余惟首禍黜還尋被鉤織械繫北行厥

勢雷轟山崩人人自保竄匿若將及之舜欽獨力疾從酷暑無晝夜行飢渴蓋是時瑾威權熾矣顧頗獨禮修撰康海敬之於是舜欽爲書上康子累數十百言其大要有四言瑾持天下衡必不以私怨殺人一又爲天下惜才必不忍殺李子二又康子必匡瑾以古大臣之業三又康李義交也即爲之死諱不爲過四康子爲斂容謝焉旣歸疾愈益甚於是治居于東野墟中茅屋土垣學辟穀道引之術蓋逾年竟卒以正德五年六月十三日從父葬于新墓銘曰奕奕大左肇自逢橋八百雲布英森秀翹爰有東吳實生仁宏再世不仕子孫以興桓桓爾祖邦之司直秉志不

易中路鍛翮於惟我舅先訓是敦光光巨藩來儀作  
賓郡君作配顯王維孫高祖太祖厥封廣武惟茲郡  
君淑貞奉姑誕育三雛玉也挺如嗚呼弟玉孰使女  
挺孰奪其永急難在心我淚如縷銘于堅石子目其  
瞑

儀賓左公合葬志銘

正德十六年三月廿九日我廣武郡君卒既殯其子  
舉人國璣筮地焉遇同人上九同人于郊无悔又筮  
方遇坤西南得朋於是偕術人出大梁西南行七十  
里至其祖母崔塋西獲地焉先是弘治二年六月三  
日儀賓左公卒於白塔兒梨園中葬矣以弗吉遷之

園東四百步而公長子國璿死葬從之三子國玉死  
又從之四子國衡又從之衡母郭氏死又從之至是  
國璣盡發其諸櫬奉之西郡君葬既與公合而諸等  
墓各如禮從其日爲嘉靖元年二月七日其地尉氏  
康墻保坳也郡君父曰三鎮國將軍將軍父曰鎮平  
恭靖王恭靖王父曰周定王周定王父是爲 太祖  
高皇帝將軍娶楊夫人以景泰二年四月十九日生  
郡君生十六年而婚於左左公諱夢麟字應瑞永新  
逢橋人也父曰左輔監察御史謫炎方驛丞而繼娶  
于崔景泰二年五月七日生我公炎方已而承擢尉  
氏知縣携公尉氏會恭靖王避水如尉氏見公遂以

之婚郡君爲郡君儀賓授朝列大夫籍宗人府云公  
修軀偉姿讀書善繪喜吟喜與豪人游是時家貲鉅  
萬起第宅闢園田出則駿馬聳蓋僕從都入則引醇  
飫肥鳴琴揮管灑然竟日崔之殂也公廬諸墓無何  
疾昇歸卒矣年四十耳郡君雖貴人然天性慎惠持  
禮奉姑暨夫無殊于家人喚姑崔面背咸姑及庶姑  
邵面背又咸姑而夫之殂也屏澤飾卸華綺蔬素終  
身怒不至詈笑不見斷終其身弗踰闕見人也然早  
天其三子過痛癢痺瀝瀝涎已又亡其女暨邵氏姑  
又折其冢婦竟以憂卒年七十一矣是時孫男子左  
驂始有婦左駮左騶左駟左駉俱孺孫女初歸于李

昆女夫李夢陽曰於乎賢罔壽壽罔愉老罔偕三者  
天下之至哀也矧又隕厥雛公之殂又火厥室廬郡  
君雖貴人然孀居憂驚茹荼至矣故君子謂天道無  
知使賢者弗穀銘曰田有弗獲黃矢闕之種有弗莠  
壅之灌之德有弗食守一俟時嗟我公同茲永茲宅  
茲聚茲陽發陰茲驅神役祗由本達支以乘厥生以  
融厥明以祥以靈以觀厥成

○封宜人曹妻左氏墓志銘

左氏者李夢陽妻也左氏蓋廬陵人曰仁宏者生泰  
州知州輔輔生宗人府儀賓夢麟而儀賓婚廣武郡  
君戚化乙未十月巳丑生左氏於汴邸郡君者鎮平

永新

恭靖王孫王周定王第八子也左氏生十六年歸李氏李氏者陝以西人也李子父曰奉直君奉直君爲封丘溫和王教授居汴而挈其子夢陽來初李子幼婚妣咸不之婚也曰教授微而貧及妣左氏儀賓則顧獨喜入白其母并郡君氏母郡君乃亦咸不之婚也曰夫非李教授兒邪微而貧儀賓曰李氏子才竟婚李氏是時李子生十有九年矣明年爲弘治辛亥左氏生子枝云踰年壬子李子舉陝西鄉試第一癸丑登進士第左氏從李子京師會姑舅連喪李子西於是從而西戊午李子拜戶部主事居京師左氏復從京師已從通州已未 孝宗皇帝上 聖慈仁壽

天皇太后尊號封左氏安人給 勅命壬戌李子權舟河西務左氏從河西務明年李子餉軍西夏挈左氏還過汴是時儀賓母儀賓亡矣獨郡君而左氏翟冠翠翹揚帔曳裾見焉其行于于也暫而頽頊而流珠郡君喜已而泣顧謂侍人曰向謂李生微而貧乃今若此矣因道儀賓語云云愈益泣而慟乙丑李子進戶部員外郎會 今皇帝上兩宮尊號左氏進封宜人給 誥命兩命咸美辭云明年丙寅爲正德元年李子進郎中是年冬尚書洪洞韓公率百官彈宦官劉瑾等瑾以彈事出李手明年正月驀逐李子奪其官於是左氏從李子還而潛大梁墟中己巳左氏



兒有婦矣庚午瑾誅明年李子起江西按察司副使  
提學是年左氏有孫壬申李子迎左氏於江西左氏  
舟河行值樁舟破僅免入江過馬當帆脚打僮人落  
江沒及湖口風逆困崖下洄渦中舟突崖石時時響  
於是左氏怖欲死計繫之登石免甲戌李子以與江  
御史構從理官於上饒而徙左氏星子會訛言賊過  
星子於是左氏自徙於潯陽是年李子官復罷道潯  
陽就在氏沂江入漢至於襄陽將居焉會秋積雨大  
水堤幾潰左氏曰子不心大梁非患水邪夫襄汴奚  
殊矣且蘇門箕潁之間可盡謂非丘壑地哉李子悟  
於是挈左氏歸歸而左氏病踰年骨立死死之日正

德丙子五月丁未年四十二矣翌日牲奠左氏烹牲  
腸腸自團織文理陰陽狀若流蘇垂綬夾耳提襟在  
上李子觀之哭愈慟曰嗚呼神哉於是賦結腸之篇  
李子哭語人曰妻亡而予然後知吾妻也人曰何也  
李子曰往予學若官不問家事今事不問不舉矣留  
賓酒食稱賓至今不至矣即至弗稱矣往予不見器  
處用之具今器棄擲弗收矣然又善碎損往醯醬鹽  
豉弗乏也今不繼舊矣雞鴨羊豕時食今食弗時瘦  
矣妻在內無嘻嘻門予出即夜弗扃也門今扃內嘻  
嘻矣予往不識衣垢今不命之澣不澣矣絳剪描刺  
妻不假手不襲巧咸足師今無足師者矣然又假手

人往予有古今之愼難友言而言之妻今入而無與  
言者故曰妻亡而予然後知吾妻也李子買大陽之  
山嘉靖某年月日葬左氏山下杉棺栢槨負坎抱離  
四山三水是山也鈞州北三十里里曰東張南稱杷  
裏右蒿前穎左連具茨李子曰嗚呼匪志曷彰匪銘  
曷藏志防虞銘永處矧吾妻矧又吾知吾妻於是志  
之而復銘之而刻之石銘曰坎而宮汝藏汝封亦旣  
考終汝曰咈約而修伸妍而短屈惟屈與伸由人匪  
人繹而思之我心如焚廼竟汝分生雖汝分歿汝共  
墳萬祀千秋孰孰修汝樂斯丘

處士松山先生墓志銘

大明正德四年六月四日處士松山先生卒年七十  
有六歲先是處士便數諸飲食不可口顧惟啜白酒  
又足時時腫無力謂余曰歲在蛇矣吾其死乎死則  
子銘其墓余止之曰胡言之遽邪然竟死也悲夫處  
士有甥曰王洎賢而文實主乃葬事來速銘而處士  
弟壩會又以其遺事來赴因并掇拾爲志志曰處士  
姓牟氏名瓚字伯玉號松山蘭陽人也父陵官至山  
西左布政使娶谷氏夫人生四子處士長也幼穎異  
於書無所不讀然刻苦因而吐血服白朮丸數十升  
愈已又時病目廼棄去以商遊吳中盡發其蘊爲詩  
由是知名吳中嘗過丹陽買舟行一人來附舟直入

寢所處士心知其盜也。佯落簪舟底而盡出其衣篋。鋪設求之。又自解其衣以示無物。又俾僮與酌酒。夜則自撫其臥側。明日其人去。未幾殺人于丹陽城中。被縛。乃以其事語人曰。吾幾誤殺車公。人服其智。經營四十餘年。遂起家至于金。顧盡散諸弟男女及族。若所識貧乏者。已而金輒復集。集而復散。終不爲自計。嘗起第大梁東門。結亭。蒔木芙蓉菊。亭旁更爲詩。先後所爲詩積萬餘數。造詞嶮削。棘澁大類黃鞵。亦爲金。元曲而比事假托。謔浪不恭。大抵玩世而泄所不平。酒中竦身按歌。其首亮重。越裂出宮。雜商若敲。金戛石歌。竟引滿掀髯而笑。人莫之測也。居常布衣。

簪帽非名士而罕與往來。蓋終其身足跡不至公府。云。謂人曰。我死稱爲松山處士足矣。竟以此率先娶劉氏生子忠。上洛王教授先卒。繼朱氏生女適生。薛嵩側室潘氏生子鏞。常自憤其末年家事不遂。臨終曰。我死薄斂。不用槨棺。首第書曰。丘松山不瞑目之柩。又曰。死即反葬。毋殯。鏞奉治命以卒之。六日而反於蘭陽之。地與劉氏合。忠有五子四女。銘曰。丘氏之先肇自東明。曰丘彥德。始遷蘭陽。傳之仲和實生。士能。士能生陵處士三季璐。珮及珙。珮至叅政。珙爲縣令。珮才亦處處士。捐館。二季先喪。惟珮緋挽於平處士。遠蹈跨時危。行德孤敦實。斂華獨行不疑。人皆

劫劫我約而腴季承以官承志者吾歸于玄所從父母祖

灑亭先生墓志銘

先生姓徐氏鄆城人也名聰字聞博嘗亭灑上於是稱灑亭先生先生力行篤學苦節清修以廉孝聞春母病思櫻非時無從得先生泣禱行彷徨叢薄間遇櫻歸母食之愈人大異之稱徐孝子夫冬林之筍冰溪之魚固非時者也精誠之至氣變以之故巢慕之雀避舍之蚊君子不謂之怪也斯亦足以知天矣今例第不以孝文則第孝子乃為諸生攻文文又弗第也乃以貢為醴泉縣學訓導云李子之西也嘗往來

奉天之墟是時訓導罷矣乃土人猶往往能道訓導行事李子聞之則慨然而嘆曰吾不試故藝向使渠非小試之安知不目其為元兀之腐夫訓導之訓其徒也先行而後文制外以兼內講肄以端其習考覈以程其規標的以大其業宏博以遠其思抑揚以厲其志夏楚以鼓其氣久之士憮然若失也勃而變色翁而從翻然而革訓導乃忻忻喜曰吾志其行矣於是構齋植竹栽冠委裾講唐虞周孔之緒而乾州學會官缺檄訓導往攝之久之而乾之徒猶其徒也於是人始知訓導敬重之謂之才醴泉飢餓參政者出帑金千檄訓導賑之或問錢奚捨縣而任學也錢曰

人也孝廉孝則不忍人廉則不愛金飢婦有剔齒食者縣捕之將磔之市訓導見之則泣曰不能使之不飢而能使之不齒乎非情也夫剔齒救斃耳而今磔之是以斃易斃也令釋之人聞之愈敬重訓導謂其才乃使攝其縣事縣以之治於是豪人俱歸我侵田于學志行矣無何免去或咎之訓導直哂曰子謂我兀兀腐夫邪其亭灑上也年向衰矣猶聚徒說先王顧益篤即大寒暑罔輟也晚病目省延接矣至遇經生學子則顧繼緒竟日李子曰予之南也嘗度灑矣於是又獲知灑亭先生云而灑上人蓋至今稱儉鯁直篤行躬學必首先生先生生宣德乙卯三月廿七

日卒正德辛巳九月一日年八十七歲娶陳氏義士陳某女先卒繼甘氏壽官甘鍾女年五十三歲亦先卒甘生徐固舉人女聘舉人趙應式卒側室趙氏生徐確女適袁嵩卒徐生曰於乎吾父幸有聞抑孰知吾母者母貞懿寡言起家勤矣追遠近矣逮下惠矣途路瘁矣然弗壽弗貴矣抑孰知母者按徐氏諱保國初始徙郟城城西三里許其世墓也以正德年月日葬灑亭先生於墓而二配合銘曰楸楠在山匠氏之趾和璞終韞玉人其鄙囊穎攸脫乃斂乃歸剗耀刮垢鉤賸探微約之身揆之文以嘏其嗣人先民哉

高處士合葬志銘

高處士者大梁人也名瑾字彥節年六十八歲正德四年二月五日而卒葬鄭門塋矣後十有二年爲正德辛巳而其配侯氏亦卒以明年正月廿七日啓處士窆合焉侯氏少其夫二歲卒之年七十八矣生二男子長曰珣東明縣丞擢知黟縣又知東光次曰璐從弟提殺之二女子一歸周鏞驛丞一歸陸澍典膳珣生三男子長曰爵次曰仲嗣縣學生次曰叔嗣舉人璐一男子曰愛李子曰孔子有言善人吾不得而見之矣得見有恒者斯可矣予誦其言未嘗不酸心流涕也蓋重傷時俗之偷云夫感贖成真溺華忘實礦金璞玉非其人莫識也乃人見藝材辯博豪縱赫

霍輒歛龍慕效稱賢或裁冠飛纓氣使威喝則又嗟羨敬事之遂令閭閻山野惴惴自修力田飭行之夫閭沕無聞不見禮於輩流吁時之偷亦甚矣乃余幸知高處士處士固閭沕人也夷考其行則孝弟儉直者也少事母歲時上壽自歌舞爲懽事其二兄旦趨侍上食而退出則爲執鞭或道旁伺顏色蓋猶事父云長而喜誦書史說先王然不務裘馬不喜酒不畜媵婢嘗歲暮出取負欠割券馳一空車歸里人望見盡笑之處士不較也珣丞東明也強逆處士官邸戚額曰吾自不入公府今公府居邪會舊令代之去問處士曰我孰與新令賢處士默然熟視之已而曰

君似弗如也令嘆服其直人又言處士家居里巷子弟見之為起拜肅立僮僕假借不復關白其主人雞豚放猶一家斯益足為淳風矣侯氏者岩之女也事姑猶夫事母事二嫂猶夫事二兄嫂之子提殺璐也侯與處士計曰吾幸尚有珣奈何令伯氏無後卒出之獄以百金詣處士謝處士不受詣侯謝侯亦不受曰吾利而金出汝邪君子謂夫婦者足為媿德駢美者矣而顧咸闇沕闇闇弗彰吁足傷已足傷已珣之知東光也亦強逆侯侯弗往曰汝父不恬公府吾獨能跋涉就汝邪人言侯即老親戚子弟罕得見其面禮婦人問荅不踰闕出則擁蔽其面殆斯之類也夫叔嗣曰吾先有上人也 高皇帝定天下也立幟以定民曰赤幟軍白幟民曰義者傳白幟遂徙大梁從民義生一子九九生一子清清娶李氏生三子聰讓處士銘曰墨不能朱石不能糜松柏冬榮厥操詎移居約履躡驗秉觀頤我躋彼蹶彼昭我晦匪財而富匪爵而貴蹈貞服朴是曰民良高恰布衣孝弟直方閭里起敬閨人贊襄滅獲循循子孫赫昌今之梁孟考世莫識不有曰季孰知冀缺不有景升孰欽龐德我言匪蕪微此銘石

劉處士墓志銘

劉處士者泰和人也名熙字和皞號敬止於是稱敬

止先生先生歿二十年是爲嘉靖元年而其子潛始以中江教諭文衡於河南李子之提江西學也嘗識潛諸生中異之而首拔之於是潛見李子而泣而求銘其父墓曰於乎潛死罪死罪父歿二十年矣而墓無銘也潛誠死罪死罪雖然有待也非敢後也李子曰往吾按泰和也嘗聞若父矣矧潛也遊吾門序曰曰劉氏者其先金陵人也後徙泰和之珠林已又徙荷山號荷山劉氏諱公唯者潛曾大父也號醉德醉德生元鎮號訥軒訥軒生處士即敬止也處士少孤不仕然讀易精詣授之第第官新會簿授之子子以之第授之徒徒多爲名流處士故善酒母嘗病革處

士籲天求身代獲愈於是絕口不酒亦不復肉如是者幾十年周旋膝下母竟以壽終母之終也處士苦塊棺側以俟其弟來凡年餘無渝無惰蓋其性方剛得諸天者如此而族屬有犯或弗悛者必鳴以攻之諸生弗率者斥去不少貸以是人服其誼而憚其嚴云處士生某年月日年六十有七歲配蕭氏石岡大家子與處士齒德相高先八年卒生子一潛也女一適某潛配歐陽氏生子二女一云李子曰予讀泰之九三而知天人之交也劉氏其當之矣夫劉氏於趙宋顯矣科第甲一邑是後浸遠而寢微非謂無平不陂無往不復者歟夫醉德而下三世約矣然能歛華



而敦實守一履朴堅德固性迄於潛也文行卓如後  
將有大聞於時非謂艱貞无咎勿恤其孚于食有福  
者歟夫天人判者爾往來進退譬猶符券至數百年  
而猶合於劉氏見之故曰予於泰九三而知天人之  
交也銘曰耕也或餒時也或萎惟德之綿其悠如泉  
流之爲川渟之爲淵流之匪爵渟之匪約君子有穀  
後食其福

梅山先生墓志銘

嘉靖元年九月十五日梅山先生卒於汴邸李子聞  
之繞楹彷徨行曰前予造梅山猶見之謂病愈且起  
今死邪昨之暮其族子演倉皇來泣言買棺事予猶


疑之乃今死邪於是趣駕往吊焉門有懸紙總帷在  
堂演也擗踊號於棺側李子返也食弗甘寢弗安批  
數日焉時自念曰梅山梅山梅山姓鮑氏名弼字以  
忠歙縣人也年二十餘與其兄鮑雄氏商于汴李子  
識焉商二十年餘矣無何數年不來李子問演鮑七  
奚不來也演曰父母兄三喪曰喪舉矣奚不來也曰  
七叔父四十四歲始有子而姪也一耳以是大係乎  
身家已又問鮑七何爲演曰理生飭行訓幼睦族玩  
編修藝課田省植八者焉已其久也內孚而外化之  
是故鄉人質平剖疑決謀巧益者必之焉故效良則  
芳標美規懿者必曰鮑梅山鮑梅山云正德十六年

秋梅山子來李予見其體腴厚喜握其手曰梅山肥邪梅山笑曰吾能醫曰更奚能曰能形家者流曰更奚能曰能詩李予乃大詫喜拳其背曰汝吳下阿蒙邪別數年而能詩能醫能形家者流李予有貴客邀梅山客故豪酒梅山亦豪酒深觴細杯窮日落月梅山醉每據牀放歌厥聲悠揚而激烈已大笑觴客客亦大笑和歌醉歡李予則又拳其背曰久別汝汝能酒又善歌邪客初輕梅山於是則大器重之相結內明日造梅山邱歎焉汴人有貴客欲其懽於是多邀梅山梅山遂坐豪酒病損脾今年夏患瘧李予往候之梅山起牀坐曰弼瘧幸愈第痰多耳然業處分諸

件令演辨酒食俟其起觴客別而還歛也先是梅山作憶子詩曰吾兒屈指一載別他鄉回首長相思在抱兩週知數日携行三歲隨歌詩筵前與誰論賓主膝上爲我開鬚眉情偏憶汝老更苦中夜難禁迴夢時李予因說曰君病無苦念家梅山曰諾諾不數日而君蓋棺矣嗟梅山梅山梅山又嘗作燈花詩秋燈何太喜一焰發三葩擬報明朝信應先此夜花重重輝絳玉朶朶艷丹霞愛爾真忘寐聞蛩忽憶家李予曰君詩佳頓如此梅山曰吾往與孫太白觴于吳門江上酣歌弄月冥心頓會孫時有綿疾吾醫之立愈諺曰盧醫不自醫誠自醫之黃岐鵲佗至今存可也

嗟梅山梅山叔牙後也其居歛也號棠樾鮑氏  
趙宋時有遇賊而父子爭死者於是所居里號慈孝  
里云梅山父鮑珍也珍父文芳文芳父思齊珍號清  
逸高尚人也娶王氏生二子次者梅山梅山娶江氏  
生一男子二女子男曰若渭今六歲矣梅山生成化  
甲午某月日距今嘉靖壬午得年四十九而其櫬還  
也演實匍匐苦心以之還厥情猶子也以某年月日  
葬某山之兆銘曰崎嶇巖巖人謂非險淵洄瀕洞猶  
謂之淺坦彼周行彼復而迷桃李何言下自成蹊嗟  
鮑子胡不汝悲胡不汝思

空同先生集卷第四十三





馬圖

